



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

Israel mitkar aser Netanyahu tsungta mangatetep tuluba akumer

Steve Cooper Leicester manager kumogo

VOL. XXI ISSUE NO. 249 (ADOK 249) DIMAPUR ROGONÜ (FRIDAY) AAMI (JUNE) 21, 2024 ₹ 5.00

## Tanü nungi DMC aser EDTC atema VIS alemtsü

**Dimapur, Aami/June 20 (TYO):** Ward ajak indang polling station nung June 21, 2024 aser June 22, 2024 anogotem anepdang 9:00 ako nungi tenzüka aruya aliba Municipal/Town Council election 2024 atema Voter Information Slips (VIS) alemtsü, ta Deputy Commissioner, Dimapur, Dr. Tinojongshi Chang, NCS ajanga Dimapur Municipal Council aser East Dimapur Town Council indang GBs/Chairman ajunga

dang metetdaksü. Anungji Voter Information Slips alemtsü atema nenok ajaki Sector Officers aser ketdangsürtem den teka amteper inyaksü ayongzüker, ta sangdong ajanga ashi. Kasa sangdong nungsa voters ajunga dang shia aliba anog nung State Election Commission ajanga shimtetja aliba identification documents bener oa pei indang VIS meshitsü metetdaksür, ta ashi.

## NSCN/GPRN (U) regional authorities senden amen

**Dimapur, Aami/June 20 (TYO):** Ato Kilonser Ino Alezo Venuh aser Kilo Kilonser Ino Huvito Yepthomi na lia Ministry of Kilo (Home) Affairs, GPRN/NSCN ajanga Tatar Hall, Council Headquarters (CHQ), Naga Unification Camp, Khehoyi nung June 20, 2024 nü 'General Meeting of Regional Authorities' ayongzüka mena liasü.

Kilonser, GPRN/NSCN lenisüba nung nungitsü pangjema liasü. Gen.(Retd.) M.B. Neokpao Konyak aser Ino Alezo Venuh nati aniba 'collective leadership' dak alaka GPRN/NSCN (Unification) banner amshiba Organisation(s) mesüra Group(s) shinga Naga homeland nung Region(s) mesüra administrative unit(s) amenoktsü memelatsü, ta iba senden nung lemtet.

Regions, Sub-Region, Union Territory (UT) aser Administrative Affairs ajak indang Regional Authorities aser Administrative Affairs aliba senden nungya 'Extra-Ordinary National Assembly Resolution of 21st April 2024' nung nokdaksü pangjemshi aser Gen.(Retd.) M.B. Neokpao Konyak, President, GPRN/NSCN aser Ino Alezo Venuh, Ato

Senden nungsa collective leadership ajanga Working Committee, Naga National Political Groups (WC, NNPGs) kübok GOI den November 17, 2017 indang "Agreed Position" nung ajemdaker tajunglen agi ken o jembishiniü metembeng tashi Naga yimten ken o jembitsü asendenshir nungloksü.

## ULB Election: Lok Sabha MP & NPCC tir, S. Supongmeren Jamir-i Congress telok pur atema nübu yimtsür

**Mokokchung, 20th June (TYO):** Indian National Congress (INC) nungi adoksang Nagaland Lok Sabha MP aser Nagaland Pradesh Congress Committee (NPCC) tir, S. Supongmeren Jamir-i tang aruya aliba ULB election koba 26th June, 2024 nü agitsüba lir, iba dak sentakba atema Mokokchung, Mangkolemba aser Changtongya town-tem nung anogo ananü par Congress telok pur asoshi nübu yimja jajaogo.

candidate, T. Nungshitemjen Jamir, ward No. 11 – Sangtemla nungi INC candidate, I. Temsu Jamir, ward No. 9 – Majakong nungi INC candidate, Bendanginla (unreserved), ward No. 4 – Artang (women reservation) nungi R. Asangla aser ward No. 16 – Marepkong (women reservation) nungi INC candidate, Rongsenlemla parnok atema lokti senden balala ayonga nübu yimtsüba liasü.

19th June, 2024 nü 21 Tuli ACCC-i ayongzüka Tuli Town Council kübok Ward No. 2 nungi INC candidate, Imobendang Lemtor, election-i aitsü sangdongba den repsema Congress candidate asem – Imlionen Lkr (ward No. 5), Temsümba Imsong (ward No. 6) aser K. Imlitemjen Jamir (ward No. 8) nung tetokteper meli-i takok anguba asoshi tenüngsang agitsüba sentong ka Tuli FRMCA Hall nung meraketa agiogo. Kasa anogo nung Mangkolemba town council kübok ward No. 3 nungi INC candidate, Zamok aser Changtongya town council kübok Longchara ward nungi INC candidate, Marwati atema nübu yimtsüba sentong tesem balala ayonga aka.

Nübu yimtsüba sentong balala nung tongti tesemdang, Nagaland MP & NPCC tir, S. Supongmeren Jamir-i jembidang, nüburtemi pa nem yimli aser temeim sayua MP nung mentetsüba maongka agitsüba asoshi pelaba den Tsüngrem nem tenüngsang agitsü. Tawa tembangba MP election yagi Naga nungeri tamangba yimsü, sobaliba, kin tila/tulu kecha tebandang meli-i inyaksangshiba aser democracy wazüka ayutsü tejangraba mapa agi sayuogo, ta ashi.

20th June 2024 nü Mokokchung municipal kübok ward No. 15 - Yimyu nungi INC

Iba takok ya Tsüngrem sayatenya ajanga lir, anungji, Maparen ajak nung Tsüngrem tamendakdak sür inyaksü azüngashiogo. Aji oda, nübur tenzüknüka Congress-i küm 20 dak tama maongka menguteti aru, saka tang ya maongka angur asünung, Tsüngrem akümtsüba nübur tenzüksü paisa shisem. (Maneni tapak 2 nung...)

## Nagaland ULB election nung candidates 523, voters 2.76 lakhs lir



State Election Commission ketdangsürtemi Kohima nung osangbener den jembidang tangokba noksa ka yangi angur. (Kohima, June 20, 2021)

**Kohima, Aami/June 20 (TYO):** Nagaland nung urban local bodies (ULBs) atema aruya aliba election nung Ward 269 atema candidate 523 tokteper, aser voters lakh 2.7 ajanga parnok tia lemtetsü.

Nagaland nung municipal councils asem aser town councils 36 lir. Nagaland nung ULB elections ya tesüsa 2004 küm agir küm 20 sülen June 26 nü agitsü lir.

State nung municipalities asem aser town councils 36 kübok wards 418 lir aser yangji tetsür atema wards 142 wazüka lir.

Kohima nung Brehostibarnü osangbener senden ka nung jembidang, nominations ajak agi 670 liasü aser scrutiny asüba nung pezü meshidak liasü, candidate 79 withdrew asü aser candidate 64 den tokteper mali shimogo, ta State Election Commissioner (SEC) T. John Longkumer-i ashi. Eastern Nagaland nung aluba

town councils nung toktepsür candidate kata mali, aser tang candidates 523 tokteper aser voters 2,76,229 ajanga parok tia lemtetsütsü, ta pai ashi.

Vote agitsütsüpur rongnung tebur 1,36,062 aser tetsür 140,167 lir.

State nung ULB elections nung toktepba party tem ya Nationalist Democratic Progressive Party (NDPP), BJP, Congress, Naga Peoples' Front (NPF), Rising Peoples' Party, RPI (Athawale), JD(U), LJP aser Independent alitsü.

Voting ya June 26 anepdang 7:30 ako nung tenzüksü aser nikongdang 4:00 ako nung tembangtsü, ta pai ashi.

Elections agitsü ghonda 48 lia lokti adenshitsu memelatsü aser iba ozüng ya police aser civil

administration ajanga mapa kuma inyaksü, ta metetdaksü.

ULB elections indang security ajanga Nagaland police-i ketdang asütsü, ta ashi.

Iba election nung non-Naga indigenous nisung kata metokteper aser tezüluba nung ken o ashishiba mali, aser iba maparen state sorkari inyaksü," ta Longkumer-i ashi.

Dimapur nung Congress candidate ka indang nomination tang teinyakdak BJP MLA kati agiendaksü ta tai tonglokja aliba sendakba nung Commission-i formal complaint ka agizükogo aser Deputy Commissioner aser Returning Officer Dimapur dangi zülüogo aser telangzüba ata lir, ta ashi.

Pai elections timi aser talenba makai agitsü ayongzük aser temzüng-ozüng dak tamang kaa aser azüdokshi mapa meinyaksü ayongzüka liasü.

SEC-i kechiba EVMs melen ballot paper amshitsü lemtet ta asüngdang dang, EVMs amshitsü atema Election Commission of India nungi temelaba magütsü, ta SEC Secretary L Jamithung Lotha-i ashi.

Iba dak sendakba nung state nung ballot boxes peria mali, anungji Arunachal Pradesh dang teyari meshi aser parnoki teyari agitsü, ta State Election Commissioner, T. John Longkumer-i ashi.

Security indang osang lemsatepba mapang, district 10 kübok wards 278 nung election agitsü, ta State Police Nodal Officer Limasunep Jamir-i ashi.

Polling stations 530 lir aser item nungi 'normal' category nung 92, 'sensitive' category nung 209 aser 'hyper-sensitive' category

nung 229 lir, ta pai ashi.

Election agiba mapang lendong timtem nungi kumzüka alitsü mechi sepai 8100 amshitsü aser yangji District Executive Force (DEFs) indang company 41, Nagaland Armed Police indang company 28 aser Indian Reserved Battalion indang company 38 densema state security forces company 108 lir ta ashi.

"Ozüng meraksatsü aser state nung election sunepa agitsü mechi ozüng kübok onoki mera ajak agitsü," ta Limasunep-i ashi.

State nung ULB elections agitsü atema ajak renema lir aser training agiba maparen tembanga polling personnel ajak renema lir, ta SEC Secretary Wonchio Oduo-i ashi.

Iba election nung Eastern Nagaland Peoples' Organisation (ENPO) ajanga Eastern Nagaland tesemtem nung shilem magitsü telemetba agia lir.

ENPO nung Naga nung kin tenet aser state kübok district trok nung prokshia lir, aser parnoki Frontier Nagaland Territory (FTN) khanga local body polls nung shilem magitsü May 16 nü sangdonga liasü.

Parnoki 2010 küm nungi state balaka khanga arur aser Nagaland anüdoklen district trok ya küm aika senzüka yuja arur ta ashir.

Item tesem nung nominations 59 liasü, saka tribal bodies temi withdraw südaksü, anungji Nagaland anüdoklen town councils kata nunga candidate kata mali.

Par telemetba nung akangshia ENPO ajanga parnok aliba tesem nung public emergency sangdong aser April 19 nü Lok Sabha election agiba nunga shilem magi.

## State nung Single Use Plastic mamshitsü atema senden amen

**Dimapur, Aami/June 20 (TYO):** State nung Single Use Plastic samatsütsü aser plastic jana tem tajungtiba nung ketdangsütsü asoshi jembishiniütsü atema Nagaland Chief Secretary, Dr. J Alam, IAS ajanga department balala indang AHODs tem den senden ka June 20, 2024 nü CS Conference Hall Secretariat, Kohima nung ayongzüka mena liasü.

Iba senden nung jembidang, plastic jana ya asangsang nung tebilemstü tulu kumogo aser state asoshi action plan tajung nungdaker, ta Chief Secretary-i ashi. Iba senden nung züngsem temi liter ka tekübok tzü indang plastic bottle tem August 1, 2024 nungi okshia nokdangtsü principle nung mulungtepa ayu. Sikkim nung Single Use Plastic okshia nokdangtsü atema mera agiba athishia züngsem temi state nunga microns balala süaka single use carry bags tem okshia nokdangtsü telemetba agia liasü. Chief Secretary Alam-i tawa Doyang reservoir nung plastic jana agi asüngba indang süok aser Disaster Management, District Administration, volunteers aser danga agency balalai iba reservoir takok ngua mürekba atema tenüngsang agüja liasü. Ajisüaka pai Doyang mission

liter ka tekübok tzü indang plastic bottle tem August 1, 2024 nungi okshia nokdangtsü principle nung mulungtepa ayu.

Sikkim nung Single Use Plastic okshia nokdangtsü atema mera agiba athishia züngsem temi state nunga microns balala süaka single use carry bags tem okshia nokdangtsü telemetba agia liasü.

Chief Secretary Alam-i tawa Doyang reservoir nung plastic jana agi asüngba indang süok aser Disaster Management, District Administration, volunteers aser danga agency balalai iba reservoir takok ngua mürekba atema tenüngsang agüja liasü. Ajisüaka pai Doyang mission

ya tang atema mera ka agiba dang lir, aser nisung shiai süoki ia iba tebilemstü shisadanga plastic waste management takok ngua inyaktetsü asoshi lenmang bushitsü ashi.

Pai department balala dang media campaigns, seminar aser workshop ajanga nüburtem dang Single Use Plastic nungi timtem agitsüba indang awareness prokshitsü ayongzüka liasü.

Pai department ajunga dang geo tagging amshia department inyakyim indang document bendantsü aser department indang website nung noksa aser video tem dena update asütsü nenshia ashi.

## Raj Bhavan nung West Bengal State Foundation Day amung

**Dimapur, Aami/June 20 (TYO):** West Bengal statehood foundation day June 20 nü Dr. Imkongliba Ao Hall, Raj Bhavan, Kohima nung mungogo.

Sentong nung o jembiba mapang Nagaland Angh La Ganesan-i, West Bengal indang sobaliba takar puti otsü benjungtsü atema tanü adenshia lir, koba Nagaland nung aliba Bengali nungertemi taküm kümdaktsüogo, ta ashiba den Nagaland nung aliba West Bengal nungertem den statehood day salem lemsatepa liasü.

Iba anogomung amungba ya India sorkar inyakyim Ek Bharat Shrestha Bharat indang tanüla jungkai adokba kuli ka lir, koba linük nung sobaliba balala angateta ajungketba ajanga kati ka tangatetepba akümtsü aser akümtsübutepstü nükjidong nung ayongzükogo. Iba amala anogomung ajanga asenoki

India nung tesem balala telungjem aser diversity tali angateta akümer, ta pai ashi.

West Bengal ya literary heritage, art, music, aser cinema atema kanga nungtugu lir aser parnoki sobaliba aser kaketshisatsü ajungketba nung linük nem teyari tulu agüja arudar. Rabindranath Tagore, Amartya Sen, Satyajit Ray, aser Swami Vivekananda nung amala nungtugu nisungtemi Alima jenjang nunga parnok tsüngsü tajung toktsüogo aser tanü tashi parnoki nüburttem aika ajungmesor. Bengal nungi nungtugu nisungtem aikati linük nüjiso atema raraba mapang tongtibang shilem agiogo, ta Angh-i ashi.

Angh-isa, Don Bosco College, Kohima nungi kaketshir aser tesayurtem pelashishia agizük aser parnok adenba ajanga sobaliba balala yongtsü nung apu alaba aser kati ka nungi angazükba tanüla

sayur ta ashiba den iba sentong ajanga West Bengal indang sobaliba tajung sayaba ya ajaki kanga junga agizüktsü amanger, kechiyong iba amala sobaliba aser shisatsü balala lemsatepa ajanga kati ka tali akümtsübuteper, ta ashi.

Iba sentong nung Nagaland nung aliba Bengali nungertemi parnok indang sobaliba balala sayuogo. Sentong nungsa West Bengal Angh Dr. C.V. Ananda Bose-i video osang ka lemsatepa sayua liasü.

Sentong nung Commissioner & Secretary to Governor, Rajesh Soundararajan-i lokti pela agizükba o jembiba aser Development Officer, LIC of India & President, Durgabari, Kohima, Sudipta Kumar Dey, Advocate, Guwahati High Court, Kohima, bench, P.B. Paul nungeria o tatsütsü jembiba aser Section Officer, Jochule-i tepela o jembiba liasü.

## Mangkolemba nung coordination senden amen

**Dimapur, Aami/June 20 (TYO):** Mangkolemba Town Council coordination senden June 19 nü customary law court, Mangkolemba nung menogo.

Senden nung Chairman ADC & RO, Mangkolemba, T. Lankonsen Tsanglao-i, town officially recognize asüba sülen tang mezüngbuba council election nung shilem agitsü aliba ya otsütsüsa ka lir ta ashi.

Paisa, municipal elections agitsü koda tongtibang iba indang lemsatepa den, candidate tem ajak tokteptsü atema maongka kasa agütsütsü asoshi yimjung nung kecha tebandang makai election agitsü ayongzükba liasü. Maneni pai, Mangkolemba nung election kecha tetsükdaktsü makai sadem sadema agitsü asoshi jila sunepa alitsü koda tongtibang iba indang lemsatep.

Senden nungsa SDO(C) & ARO, Hotulo Sema-i, lokti nung mepetmesü kecha matoktsü atema ajaki tebilemdangba tajung ayutsü ajungshia liasü. Paisa, candidate tem dang Model Code of Conduct (MCC) aser election dak sendakba temzüng ozüngtem sülen tashi anga anidaktsü ajungshia liasü, ajita asünungdang election inyakyim takok ngua agiteta jila temeket nung aliba tanga tesemtem atema tatishitsü tajung kümtetsü, ta ashi.

Candidate shimba mapang

jila nung alirtemi parnok tebilemba melenshitsü nungdaker ta shia EAC Longchem & Sector Magistrate, N Orenthung Kikon-i, election agiba anogo voter temi anidaktsü asoshi lateta tokja aliba inyakyim sülen tashi anga anidaktsü atema nüburttem ajungshia liasü.

Kasa mapang nung SDPO, Mangkolemba, Rishamo Phillip Yanthan-i, election mapang minprong kar danga atalokra takaratiba nung metetdaktsütsü aser ochi mashi inyakyim benoka vote agütsüba nokdangtsü atema kümküma alitsü ayongzükba liasü. Paisa, Bharatiya Nyay Sanhita Act 2023 ajanga Indian Penal Code (IPC) melenba aser Bhartiya Nagrik Suraksha Sanhita Act 2023 ajanga Motor Vehicle Act melenba indang metetdakja liasü.

Maneni senden nung ward representative, candidate representative, NGO representative, aser Goan Bura temia o tatsütsü jembiba liasü. Taruba town council election tetsükdaktsü kecha makai takok ngua agitsü atema tesendaktep tajungba küma yanglushitsü asoshi iba senden ayongzükba mena liasü. Senden nung candidate tem, ward chairperson, Dobashi, Goanbura aser lokti tentet balala nungi lenirtemi shilem agia liasü.

## Coffee Table book 'Engaging Communities; Empowering Lives' sayaogo

**Dimapur, Aami/June 20 (TYO):** Commissioner & Secretary, Health & Family welfare, V. Kezo-i June 19 nü Hotel Vivor, Kohima nung Coffee Table book 'Engaging Communities; Empowering Lives' sayaogo. Iba ya Project Director, Nagaland Health project (NHP) Directorate of Health & Family welfare-i publish süa liasü.

Sentong nung o jembiba mapang V. Kezo-i, ketdangsur ajak nem tenüngsang agütsü aser ashiba agi, awareness balala agütsüba aser health services jenjang tajungba küma ajungkettsüba aser state ajunga nung benoka inyaksangshiba

ajanga Naga nungertemi health dak sendakba nung kanga süoki ia agi tenzükgogo, ta ashi.

Kezo-i ashiba agi, iba project nükjidongji Health care system jenjang ajungkettsü asoshi lir, koba Nagaland nung local initiatives aser innovation cross sectorial coordination aser tanga stakeholder temi jenjang tapet agia benokogo.

Coffee table book ya state küboktesem balala nungi inyakyim tajungtibatem bendenba ka lir. Iba otsü ajanga lokti tashi aser sorkar o lokti na longjemer inyakba sayur, koba ajanga stakeholder balala kodang longjemer inyakdir mapa tem takok nguteter ta sayur, ta pai ashi.

Sentong nung Project Director (NHP) Dr. Imkongtemsu Longchar-i lokti pela agizükba o jembiba, project inyaka aoba indang Deputy CMO, Mon Dr, Thomas Keppen-i metetdaktsü, Coffee Table Book experience indang Sr. Health Specialist Health, Nutrition & Population World Bank group Marion Jane Cros-i lemsatepa den sayaja liasü aser Sr. Health specialist Health nutrition & population world bank group, Bathula Amith Nagaraj-i project benoka inyakba indang lemsatep. Sentong nungsa Sr. Account officer, DHFW Imtidongzuk-i tepela o jembiba liasü.

## ULB Election: Lok Sabha MP & NPCC... (Tapak 1 nungi...)



Lok Sabha MP & NPCC tir, S. Supongmeren Jamir-i aruya aliba ULB election atema Mokokchung district nung congress telokpur atema nübu yima jasadang tangokba noksa nung angur. Mokokchung, 20th June, 2024.

ULB ya civic body election ka dang asünung, yangi treasury/opposition bench ta telemsa malitsü, terenlokji ward shia nütsüng apir (hissab) nung dang arutsü. Anungji, “yangi ruling mesüra opposition ta jembitsü kecha madoker,

saka asenoki lenir shiba shimmer, ta asübaji ang tongtibangba lir”, ta paisa ashi.

Lok Sabha nung Congress MP ka adokogo, MP kaji state ka asoshi tongtibang süngküm ka asütsü, anungji, nungdakba balala nung yariteptsü asoshi

paisa tesem balala sema senzüdang metetdaktsü. Congress ya Naga nung asoshi tapet political party ka lir, iba party yangi dang Naga nungerji liru medem kati arutetsü ta imlar aser iba party ya Naga nüburi meimba party lir aser tang ya Congress party asendenshiba mapang ka lir, anungji, temelenshi ka asoshi nüburttemi Congress candidate-tem yaria adokdaktsütsü asoshi paisa tayongzükba ka agütsü.

Congress indang nükjidong tongtibang kaji lanurtem pei pok sünga litettsü asoshi pei jangraba lenmangi yoktsübaji lir, anungji, iba nung ajemdaker maparen balala inyaktsü sentong balala lir. Iba den tetsürtem atema-a sentong balala achayanga inyaktsü tebilemba lir aser ano teinyaktsü wadang balala lemsatep.

Sentong balala nung PCC member & Mokokchung district ULB Election committee, convenor, Tshipokba Longkumer, AICC züngsem Alemjongshi, Mokokchung DCC tir – Watimongba Aier, Congress party telen balala (rank & file) nungi aser telok balala nungi meyongertemi shilem agia liasü.

## Mangkolemba nung ballot papers amshiyim sayu

**Dimapur, Aami/June 20 (TYO):** Taruba town council election atema renemshiba mapang EAC, Longchem & Sector Magistrate, Mangkolemba, Mokokchung, N Orenthung Kikon-i, ballot papers amshiba yimya sayuogo. Iba sentong ya Government Primary School, Mangkolemba nung June 20 nü agia liasü. Kasa anogo Voter's Information Slips

(VIS) lemja liasü. VIS yagi voter tem nem parnok indang polling station, serial number, aser voting anogo amala tongtibang tenüngdakba osangtem agütsür. Temetettsü kaji VIS yagi osangbo tejangja agütsür saka iba ya identification amabo mamshitettsü aser ibayongji vote agütsütsü atema polling station-i aitsü asoshi iba ya mamshitettsü.

## ADC & RO Tuli-i ULB Election indang metetdaktsü

**Dimapur, Aami/June 20 (TYO):** State Election Commission, Nagaland aser Deputy Commissioner, Mokokchung-i tetuyuba agütsüba dak ajemdaker Additional Deputy Commissioner & Return Officer, Tuli, Mokokchung-i sangdong ka ajanga ken o dak sendaka alirtem dang, election agiba anogo candidate aser pa indang election Agent atema

candidate shia gari anana dang amshitsü melatsü, ta metetdaktsüogo.

Iba den bendenloksema June 26 nü election agitsü ghonda 48 lia anepdang 7:30 ako nungi nikongtsütsü 4:00 ako tashi nung Tuli jila telongtet nung nüboyimba sentong kecha ayongzükba magitsü, ta metetdaktsüogo. Iba tetuyuba sülen ajaki tashi anga anidaktsü atema metetdaktsüogo.

## Kuzholuzo-i Government Assurances committee senden ayong

**Dimapur, Aami/June 20 (TYO):** Government Assurances committee mendenbuba Kuzholuzo Nienu-i, July 2 nü Departmental Representatives of Youth Resources & Sports Department, Home Department and National Highway (PWD) den Adoption cum Oral Evidence senden ka amentsü ta

metetdaktsüogo. Iba senden ya anepdang 11 ako nungi tenzüka Assembly Committee Room nung amentsü.

Senden dak sendakba nung mendenbubai Government Assurances Committee züngsem ajak dang tamakok maludaktsüü aru shilem agitsü asoshi mepeshia metetdaktsüogo.

# India nung tali atsükba agi 114 süogo



**New Delhi, Aami/June 20 (Agencies):** Taküm March 1 anogo nungi tenzuka June 18 anogo tashi nung India tesem balala nung tali atsükba agi nisung 114 süogo aser nisung 40,984 dak tema heatstroke süogo, ta Brihostibarnü Health Ministry-i metetdaksü.

National Centre for Disease Control data ajanga, tali atsükba agi nisung teimtiba asüba state ji Uttar Pradesh liasü (nisung 37 asü); iba sülen tanabuba,

tasembuba aser pezübuba jenjang nung Bihar, Rajasthan aser Odisha state tem liasü, ta metetdaksü.

Ketdangser kati, tali atsükba agi asürtemji iba dang nungjagi teimba asütsüa akok, kechiyong state aikati tang tashi report magütsü, ta metetdaksü.

Iba teblemetsü dak sendakba nung Union Health Minister, J P Nadda-i ketdangsertem dang mapang shia Central sorkar hospital tem sendanga tali atsükba agi shirangertem

tajungtiba nung yaritsüsa special units amenokang, ta tuyuogo.

June 19 nüa north aser eastern India nung tali atsükba agi nisung pezü süogo.

Union health ministry-i 'Heat Wave Season 2024' kübok state tem nung health department nem tetuyuba kar agütsüogo.

Health Ministry-i, "Linük nung tan mongpu nung average maximum temperature ji teimba atutsüa akok. Tali atsükba ajanga shirangertem yaritsü atema health departments-i renema alitsüla aser mapang shidak nung mera agia inyaksüla," ta metetdaksü.

Ministry-isa National Programme for Climate Change and Human Health (NPCCHH) kübok state balala nung nodal officers dang anogo shia tatsük agi asürtem aser stroke asürtem indang report tejanga yokang, ta tuyu.

Ministry-is state tem dang National Action Plan on Heat Related Illnesses (HRI) ji district ajak nem lema agüjang aser health-care jenjang tajungba küma yangluang, ta tuyu.

# Yi nung miim jemsema 34 asü

**Chennai, June 20 (Agencies):** Tamil Nadu state kübok Kallakurichi district nung yi nung miim jemsema nisung 34 asü aser nisung 60 dak tema hospital nung mongdar, ta Brihostibarnü ketdangsertemi metetdaksü.

Kallakurichi District Collector, MS Prasanth-i Government Medical College Hospital semdanga treatment tagidakpurtemji ajuruogo.

Ano külen state sorkari, iba tatalokba dak sendakba nung nisung ka tenüing agi K Kannukutti (49) puogo aser pa ket nung aliba 'arrack' yi litre 200 shi pua lir. Yi nungji nisung asütsüsa methanol tali liasü ta jangaogo.

Chief Minister, MK Stalin-ia iba tatalokba bushisüngdangtsü atema CB-CID dang tuyuogo aser Kallakurichi District Collector Sravan Kumar Jatavath transfer yok aser pa melen Prasanth shim.

Stalin-isa iba tatalokba nung asür kibongtem shia nem sen

lakh 10 aser treatment agirtem shia sen meyrjang tenenem (50,000) teyari agütsütsü, ta sangdong.

Superintendent of Police Samay Singh Meena-a mapa nungi anentsü aser pa melen Rajath Chaturvedi shim. Iba dak alia Kallakurichi nung prohibition wing kübok nisung trok mapa nungi anenja lir.

Tamil Nadu CM-i X ajanga, "Iba tatalokba nung aibelenertem puogo aser mapa nung zübazülemer ketdangsertem anema inyakogo," ta metetdaksü.

State Angh, RN Ravi-i, "Kallakurichi nung ozüing alema yi ayokba aser ajemba sülen nisung aika asüba osang angashia jashir. Ano takoksa angur aika taküm kümzüktsü atema treatment agidar, Mangyimer kibongtem den ni tejashi lemsateper aser hospital nung amongertem tekeraba nung aneptsü atema sarasadentsür," ta metetdaksü.

# Modi dang NEET-UG exam ken o bentettsü mepishir

**New Delhi, June 20 (Agencies):** Congress party-i Ato kilonser Narendra Modi dang NEET-UG 2024 exam mangatettep ken o bentettsü aser tarutsü nungbo 'paper leaks' nokdangtsü atema inyakang, ta takhangba agütsü.

Congress Tir, Mallikarjun Kharge-i, UGC-NET exam thinent süba ya kaketshirtem million aika atema tanela nung takok anguba lir aser Modi sorkar mezümeküm tamakok lir, ta ashi.

Ato kilonser Modi aija Kharge-i, "Nai exam indang kanga jembir, nai kodang NEET exam indanga jembitsü? UGC-NET exam thitsüba ya kaketshirtem million aika tanela nung takok anguba lir. Iba ya

Modi sorkar mezümeküm tamakok lir, kechiyong parnoki asen lanurtem tarutsü jenjang raksatsütsü merang," ta metetdaksü.

Education Minister-i jembiba o aija Kharge-i, "Tamalen Union Education Minister-i NEET tatidang nung paper leak masü ta jembia liasü. Bihar, Gujarat aser Haryana state tem nung education department nung ochimashirtem apu dangbo Education Minister-i ochimashi liasü, ta jembir. NEET exam kodang thinent sü?" ta asüngdang.

Ano külen Congress lenir, Rahul Gandhi-ia, "Narendra Modi-i Ukraine-Russia rara aser Israel-Gaza rara nokdangtet ta jembir, ajisüaka

kuli kar ajanga pai linük nung paper leaks bo menokdangteter mesüra pai itemji menokdangner. Kaketshirtem timtemer kechiyong iba ya parnok tarutsü tia lir. Madhya Pradesh nung Vyapam ochimashi liasü aser tangbo iba ya Ato kilonser Modi aser par sorkari linük tesem ajaklen proker," ta aitsü.

NEET exam ochimashi dak sendakba nung Supreme Court-ia Centre sorkar aser NTA na dang iba ken o jungjunga bushisüngdangtsü atema tuyuogo.

NEET-UG 2024 results tamagütsü kümsütsü aser iba tatidang agishitsü atema Supreme Court nem temepishiba ken o aika agüja lir.

# NEET agütsür pezüi ochimashi aliba nangzükogo

**New Delhi, June 20 (Agencies):** NEET tatidang ochimashi ken o dak sendakba nung Bihar nung pua aliba kaketshir pezüi NEET-UG question paper leak asüba nangzükogo.

Par pezüi ashiba agi, question paper leak asür telok jagi sen lakh 32 tashi-a meshia liasü.

NEET tatidang agütsür pezüi jagi, medical entrance exam atema question paper ji May 5 nü tatidang agitsü lia anogo ka jelia May 4 nü 'leak' asü, aser kasa question paper ji exam agiba anogo nungji angu, ta ashi.

Question paper leak asüba nung tongti asalentong yanglurji Bihar kübok Danapur Town Council nung junior engineer, Sikandar Prasad Yadavendu

liasü ta bilemer. Yadavendu-i question paper ji pa aianu chir, Anurag Yadav nem jelia agüja liasü.

Bihar Deputy Chief Minister, Vijay Kumar Sinha-i, Yadavendu ya RJD lenir Tejashwi Yadav den külemi inyaksemer kar den tesendaktep lir, ta metetdaksü.

[9:40 pm, 20/6/2024] Nungsang TY: Delhi CM Arvind Kejriwal nem bail agütsüogo

New Delhi, June 20 (Agencies): Delhi excise policy ken o dak sendakba nung Rouse Avenue court-i AAP tongti lenir aser Delhi Chief Minister Arvind Kejriwal nem bail agütsüogo.

Judge Nyay Bindu-i aniba vacation bench kati Kejriwal

nem bail agütsü.

Hokolbarnü pai bail pond sen lakh 1 agütsüba sülen Tihar Jail nungi chioksü.

Iba ken o nung Kejriwal-i shilem agia lir ta pa nem tai tonglokja taküm March 21 nü pa apu saka May ita nung Lok Sabha election atema nüboyimtsü asoshi Supreme Court-i June 1 anogo tashi pa nem interim bail agüja liasü aser June 2 nü pa tanaben Tihar jail-ia.

Osang angazükba agi, Enforcement Directorate-i court dang bail bond atema mapang telatetji ghonda 48 latettsütsüla, ibaji ajanga dang iba obendang anema temaba court ka nung ken o benoktetsü, ta mepishia liasü saka Delhi court-i magizük.

**OFFICE OF THE ALL WARD UNION MOKOKCHUNG TOWN MOKOKCHUNG : NAGALAND**

9402488031 | 9366654295 (President)  
9612302487 (Secretary)  
Dated: 20/6/24

**SANGDONGER**

AWUMT-I sangdong agütsüba dated 18 June 2024 Ao Milen adok No. 2597, Tir Yimiyim Adok No. 246 aser Mokokchung Times issue No. 153, koba tang aruya aliba ULB Election atema sangdongogo, iba sangdongji AWUMT presidential council-I meyipa agir, iba atema sar.

Sd/-  
(Limasashi)  
President  
AWUMT

Lanuwapang  
Secretary  
AWUMT

**पावरग्रिड POWERGRID**

**SANGDONGER**

- Project - "Provision of Spare Transformer & Reactor in North Eastern Region" kübok Proposed DOCO to 31-03-2024 for Transmission Asset nungi Transmission Tariff yanglutsü atema regulation-86 of CERC (Conduct of Business) Regulations 1999 aser CERC (Terms and Conditions of Tariff) Regulations' 2019 temelaba.
- Tekalen shia aliba Transmission system nung teyari angirtem yamai alitsü:
  - Govt. of Arunachal Pradesh
  - Assam Power Distribution Co. Ltd.
  - Manipur State Electricity Distribution Co. Ltd.
  - Meghalaya Energy Co. Ltd.
  - Power & Electricity Dept. of Mizoram
  - Dept. of Power Govt. of Nagaland
  - Tripura State Electricity Board
- Tariff tejanga:
 

Name of the Asset	Asset-1	Asset-2
Schedule DOCO (FR)	23.12.2022	23.12.2022
DOCO (Actual)	28.06.2023	23.11.2023
Estimated Completion Cost (Rs in Lakhs)	2620.68	1141.93
Tariff for year 2019-24 (Rs in Lakhs)		
2019-20	-	-
2020-21	-	-
2021-22	-	-
2022-23	-	-
2023-24	413.40	58.68
- Tariff jangjatsü atema application copy ka applicant indang website [www.powergrid.in](http://www.powergrid.in) nung inokja lir.
- Application nung aliba tariff determination atema proposals agütsüba nung temetongshitsü aser temelenshitsu lira, teyari agirtem densema nisung mashi kati Secretary, Central Electricity Regulatory Commission, 3rd & 4th floor, Chandralok Building, Janpath, New Delhi - 110 001 (mesüra Commission indang office aliba danga address) nem corporate office indang address nung applicant indang copy ka dener iba sangdong adoker anogo 30 tsüngta agütsütsüla.

Place: Gurugram  
Date: 17.06.2024

Sd/-  
GM (Commercial)

**POWER GRID CORPORATION OF INDIA LIMITED**  
(A Government of India Enterprise)  
Registered Office: B-9, Qutab Institutional Area, Katwaria Sarai, New Delhi- 110016  
Corporate Office: "Saudamini", Plot No. 2, Sector-29, Gurugram-122001 (Haryana)

**A MAHARATNA PSU**



## TIR YIMYIM YIMOBILEM (EDITORIAL)

DIMAPUR ROGONÜ, JUNE (AAMI) 21, 2024

### Party dak amangertem masü

**T**ang ama Nagaland nung election agiba mapang Naga nungertemi tentetba Regional Political party dang masü saka India nung tentetba National political party tapu aika indang wako ayipzüa telok telok senzüba angur. Khen bilemstübo itemji jangratemtsüka saka kodang item wako bener election nübo yima jajartem indang yimten tangatetba jenjangji repringdangdir, iba wakoji kodangang toktsütsüar memetet ser bener jajaba candidate aser nisungtem dang angutsü. Aji oda, yashi Congress nung alir ajak NDPP nung angur aser NDPP nung alirtem BJP nung angur aser BJP nung alirtem tanga telok balala nung angur ta Nagaland nung party yabo manger sangwa nung melentetba abensüoshi amai ka dang akümer. Ibaji asenok dak party angatetba agi masü aser nisung angatetba agia masü saka lenirtemi anir asenok aikati tanü ajung asaa yimten nung shilem agiba ajanga lir. Atangji, party-i masü nisungi dang anitsü, anungji party ajungyonga nisung majungtsüa akok, idangji telokji tashimait akümer. Ajisüaka, yimten telok shia tangatetba aser nükjidong balala yur tenteta lir. Item teloktem rongnung kari linük nung tamangba yimsü ka dang alitsü atema inyaksü nükjidong alitsüa akok, ano tanga telok katibo linük nung kecha tamangba yimsüa mamangtsü ta asütsüa akok, ano telok katibo linük nung senso shiai pei amangnüba amangtsüa tamangba yimsu ajak nem temeten agütsütsü akok. Iba amaji rongsen ketdangsuba tsütsüa yimten telok katibo nisung shinga balaka mekadaktsütsü atema kechisarina yangluba industry-tem ajak government ket nung dang alitsüba nükjidong nung inyaksüa akok mesüra telok karibo nübortem rongnung toktepa kadaktsütsü nükjidong nung industry mapatem ajak nisungtem nem dang inyadkaktsütsüa nükjidong yur inyaksüa akok. Ano, tanü asüngbo yimten telok karibo nisungtem rongnunga atsü- apong kecha mebendangi tetsür o tetsür na aser tebur o tebur na medemtsü aser kibong akümtsüa melatsüa akok saka ano yimten telok karibo kasa atsüapong kibong akümtsübaji kenyongi memelatsü ta akangshia nokdaktsüa akok. Anungji, election ama yimten akümtsüba mapa aser mapangbo senso shiai pei adentsüba yimten telok tangatetba aser nükjidong tama angatetsüba kanga tongtibang akümer, kechiyong election nung toktepsang candidate-jibo tajung asütsüa akok saka pa mesüra la adenba yimten tangatetba, terenemba aser nükjidongji pei tangatetba aser taginüba den meputepa, metetsümonga, peisasa lendongi ai amato asütsü. Atangji, Nagaland nungbo candidate-ia dena pei toktepa yimten telok tangatetba aser nükjidong memetet, mangatet aser terepringdanga merepringdang ser party ticket meshia tokteper asütsüa akok, kechiyong asenok atemabo party tangatetba aser nükjidongji tongtibang masü saka election nung adoker asü madoker ta asüba dang tongtibang lir. Iba jagi election nung adokertemia aser madokertemia tanaben election arudangbo yimten telok tasen ka nung dener alir. Aji oda, tatishitsü agi, yimten telok kati Nagaland atema linük temzüng nung enoka aliba arla 371 A ya agientsü nükjidong yur toktepa nunga, iba telok nungjia Naga nunggerbo alitsu. Nagaland nung alir Naga nungger yimten tangatetba jenjangji iba tashiji lir. Iba tiaji kodang jungjunga bilemdangdir, asenokbo election nung toktepa malang aser nübortema election nung tamajung agi malang ser nung kanga tamajung agiteper amai repringteter. Joko Nagaland nung Municipal aser Town Council election agitsü asoshia anogo pungonü dang anünga lir, anungji candidate-tem kanga mazüngi nüboyima senzüba mapangji anogo anasemka ya asütsü. Election tulu tila ta masü, takok tokteper asünungji meranga inyaksüla, ajisüaka party tangatetba nung tokteper masüji party o party na aser nisung o nisung na tsüngda kangabo maitsütepi nübortem tenzütsü mulungtetba nung pei tangatetba aser nükjidong indang jembiang tajungba asütsü. Atangji, pei constituency aser pei ward nung terenlok mapa inyaksü atema government-i sen agütsütsü, saka asen dak nübör tenzüknüba shisatsü aser mapa inyaksüba 'idea' melira senji sen masü akümtsü.

## OLEMSABANG

### LIPOK OTSÜ ASER AOTSÜR SUBUTSÜ ASER TEPTSÜ

~ Mrs. Meyisongla, Rtd. Deputy Director, Nursing Kohima Nagaland.

Asenoki lipok otsüren ya repringdangra kin shia otsüji balala shia lir.

#### 1. Egyptian tart nonger otsü:

Tetesük nong lishitsüng dang liasü. Küm aika nong alima kumteta meimchirtem litettsüsa akem ta jembir iba dangji "Nu" ta aja.

#### 2. Babylonion kini yamai ashir.

Dragon tetsür ka 'Tiamat' tepseta külemerang alima akem ta ashir.

#### 3. Rigvedic otsü: Tsüngremi purusha agi tenlarang alima akum ta ashir.

#### 4. Judaism aser Khristian temi yamai ashir. Tsüngremi pai molungba ama alima aser shirurutem poktetdaksü ta shia lir.

R.K Majumdar aser A.N Srivastva History of the world civilisation book zuluri Origion of the world book nong shia lir, saka ya ajak meimchirtem tebilemba ta shia lir.

#### 5. Modern view "Philosophertemi amangbaji anü aser pitinu tsüktep dang tangola tatsük telong ka tsükzüka alu. Ibaji (Planetary System by itself) long longa tsünglu aser mopung action agi alemaji jenjang balala nong tanem tanemi ali temaji mokonga akem.

Tamasa micro organism ali, ajisür tzü leplo, tzü jibja, sangken aser shirurua litettsü (meimchir dena) akem ta jimber.

Koba theory shidak asenoki ashitsü makok, Tsüngremi pai mulungba nong alima aser meimchirtem poktetdaksübajiang shidak sudi ta believed asür.

#### Aotsür Aor lipok otsu

Asenok Aotsür Aori ashir, Asenok long terok nong poktet ta ashir. Saka shidakba Aotsür Aor lipok otsüren bushir mali, kechiyong Aor lipok otsü aser libalirua aruba otsüren nong "AK dena lir" Ibajagi shidakba otsüji bushir mali südi. Aotsür Aorji tekolok tejira aser shisa kar aika liasü südi Otsü ashir.

Chungliyimti yim mesemteta alitsü nong, tamasa teyanglur Tsüngrem dang iba lima mesemteta alinong yimchi yimchunga, moamojia letettsü asü masü ta temezünger dang asüngdangteperang alitsü asoshi yimtsüyimbo yimer ajak mongdang ayongzüker shisha lemsatep yamai.

#### No.1: O Chungliyimti kong nong

Mangdang ayimer

Arür salang pang nong

Nütsüng temang senten-ang ni

Nütsüng temang senten ali

Tsüngrem kümer "Ongangla" tang jagi

Amtong amsüh wani

Tzusen tzübo külemang ta

Tzusen tzübo külemteta yulih

Orung shako agi

Yimrong süngsong tuten koni

Yamaji putu menden lateder külen parnoki yimkong mungdang jazük aser arü salang nong sentepa ain kider otsüla "Ongangla" dang asüngdang tzübo külemang aser oronger kolak agi yimrong tuten ang ta ashi. Parnoki yamaji inyakerang yim küma yimchiyimchunga ali.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Yihuda nunger aikati Tasen Lai meshir



Chicago nung 'Jews for Jesus' organization nung inyaker temi Khristan mission dak sendakba nung lenmang nung senzürtem nem kaket tilala lema agütsüdang tangokba noksa nung angur.

**June 20, 2024:** Yihuda nunger yimsü amangertem den Khrista osangtajung lemsatepba telok 'Jews for Jesus'-i, yaküm October ita nung Israel aser Hamas na tsüngda rara tenzükba sülen nungi tenzükba Yihuda nungeri Tasen Lai meshiba kanga bulua kümogo, ta metetdaksü.

Messianic Jewish movement den affiliate süa aliba organization Jews for Jesus-i Tsüngrem Chir Yisu Khrista dak amangtsü atema Yihuda nungertem ajungshir.

Jews for Jesus' international headquarters ya San Francisco nung amenoka lir saka iba telok indang branch office bo New York, London, Tel Aviv aser Jerusalem densema alima tesem balala nung yimti aika nung amenoka lir.

Iba organization-i college campus aser park ama lokti aliba tesem balala nung Yisu Khrista indang lemsateper aser o lemteptsü atema sentong balala ayongzükba agir.

Iba telok yagi charity mapa balala inyaker, soup kitchens amenoka timtemertem chiyungdaksür aser akhidang World War II mapang Holocaust nungi jenbur Yihuda nungertem tenzükba.

Jews for Jesus teloki Israel tesem ajaklen Tasen Lai angati lema agütsür. Parnok indang website aser ministry partners-One for Israel mesüra Tree of Life Ministries websites ajanga Tasen Lai angati lema agütsür.

Yaküm October 7 nü Israel aser Hamas na tsüngda rara tenzükba sülen Israel nungertem Tasen Lai 1,230 dak tema meshiogo, ta parnok metetdaksü.

Yaküm October 7 nü Hamas teloki bendangertem densema Israel nunger 1,200 shi tepsetba aser nisung 200 dak tema puer aoba sülen Israel-i Hamas telok

samatsütsü atema Gaza nung Hamas anema rara tenzükba liasü.

Gaza Health Ministry-i, Gaza Strip nung rara tenzükba sülen tang tashi nung Gaza nung nisung 37,000 dak tema tepsetogo, ta metetdaksü.

Jews for Jesus organization nung Executive Director, Aaron Abramson-i, Israel nungertem Tasen Lai kanga bulua meshiba kuliji tanela tsütsü tasüngdangba aika aruba ajanga asütsüa akok, ta metetdaksü.

Paisa, "Iba dak alia teimla samartem jenti lir. Pei linük kümzüksüsa Israel dak tashi lir, ajisüaka October 7 nü Israel nunger jenti asüba ajanga parnok kanga takoksa angu. Nisung aikati parnoki Israel nung maneni alitsü asü, mesüra Israel nung taküm kümzükba litettsü asü ta tasüngdangba arur," ta metetdaksü.

"Nisung aikati sepaitem dak melung melemteter. Rongsenkettzüng tebilemstsü atema nai tamang mekatetra nai kong temelung lemtettsü. Ibayongji nisung aikati tanela tsütsü tasüngdangba jenti akar asütsüa akok," ta paisa metetdaksü.

Abramson-isa, Israel nung iba organization nung inyaker staff tem aika kinüngtsürtem, kinüngburtem aser chirnurtem Israel sepa nung lir, ta ashi.

Iba organization-isa Hamas teloki amakba ajanga kongshirtem yaritsü atema Samaritan's Purse ama melungtet telok kar den partnership yangluogo.

Yaküm October 7 nü Jews for Jesus-i Tel Aviv nung aliba parnok indang Moische Roshen Center nung timtemertem yaria mozü aser toiletries densema nungdakba oset balala agütsür.

Ajisüaka Yihuda nungertem den Yisu Khrista indang lemsatepba Jews for Jesus-i

timtem aika ajangshidar. Iba organization nung CEO-i, Orthodox kari Jews for Jesus indang mission mapatem anema nokdakba osang lemsatep.

Pai ashiba agi, tesüiba mapangtem nung Jews for Jesus organization-i Yirusalem nung Khrista osangtajung lemsateptsü merang saka nisung Yeshiva nungi nisung 20-30 shii parnok nokdanga liasü.

Yeshiva ya Yihuda nunger sobaliba shisaliok agütsüba institution ka lir.

Abramson-i, "Judaism branch aikati Yisu ya Messiah ta mamanger. Ajisüaka Israel aser bendanglen United States nung alir Yihuda nungertem aikati Yisu ya Yihuda nunger Messiah ta amanga Yisu dak teimla angurtem aika lir," ta metetdaksü.

Paisa, Yihuda nungertem den Khrista osangtajung lemsatepba maparen ya temelabo masü kechiyong Yihuda nungertem tsüngda tangatetba balala alir jenti lir, ta ashi.

Tatishitsü agi, secular Yihuda nunger kari Tsüngrem dak amangba tsütsülen tasüngdangba jenti lir aser Orthodox Yihuda nunger tangatetbabo balaka, ta pai ashi.

"Anungji ni nisungtem den tebilemba kar lemsateper. Mezüngbuba nung tetsübu. Yihuda nungerjia tangar dang nungi kecha balaka masü, anungji parnok den sadoksadoka jembitsüla," ta pai ashi.

"Nai parnok (Yihuda nunger) melungjang nung metsühjang tilaka proka yutsütsü akok. Khenkhenbo Tsüngremi na tasü itdaksütsü aser ajungmesotsü, iba mapang nungji nai tasü itta parnok dang 'ni nü den langka lemsatepner' ta shitettsü. Yamaji nisungtemi Khrista dak tamanga katettsü atema nü nem lenmang lapoktsütsü," ta paisa metetdaksü.

## ANOGO ABEN TSÜNGREM DEN

### Aria bilemba counsellor

"Saka nenok oang aser ya kechi tetezür, angazükang, ni tenla masü, taochi aginür" (Mathi 9: 13)

1. Ne tebilemstsü taroktiba lemsateptsü asoshi nai kechi koma nübu ka aginür?

2. Nai iba ama nübu akümtsü mulungtsü asü? Khristan counsellor asoshi taginübaji shiba den tangari tesüiba aser tang aliba tebilemstsütem temulung doka lemsatetter, iba jakla adenba Christian Counsellor atema College degree menüngdaker. Aji saka shirnoki counseling mapa inyaker, parnok Laishiba nung amendaker agütsüba training agiba jagi tulu ka yaritsü. Na kong lidir liang, aria bilemba shisatsü ne dak lira Tsüngremi na tangar yariba nung amshitsü.

Nai nisung ka pa otsü ajungaji memetetra pa/laji nai meyaritettsü. Nisungtemi asenoki parnok asoshi kodaka aria bilemstsü aji memetetra, asenoki kodaka metet parnoki au ta malitsü. Aria bilembaji yaritsü asoshi tasa kar angazükba masü; ibaji Khristan jakla aser temeim lir. Counsellingji tesüiba tebilemstsütem bentetba ajanga tang aliba tebilemstsütem nung yaritsü lenmang bushiba lir.

Temulungjang Satan talidak yangludaktsüba ajanga tebilemstsü adoker. Nisung nüji masüba ajanga aintsü makoker. Counselling nükjidongji Khristantem nem Khrista nung nüji akümba metetdaksütsü aser pa den jajaa tejang atangba taküm ka kümdaktsütsü asoshi lir.

Kibuba, aria bilemba shisatsü kü dak renlokdkjang, idangji ni tangar yaritettsü.

## Rajasthan nunga anti conversion ozüng benoktsü atema inyaker

**June 20, 2024:** Tang India nung state 11 nungbo anti-conversion ozüngtem benoka lir, aser maneni ano state ka nung iba ozüng benoktsü tebilemba lir.

India kübok state aika nung anti conversion ozüngtem kübok Khristantem aser Muslim nungertem nem tiyazü nung tai tonglokja apur aser reshikangshir.

Bharatiya Janata Party (BJP) sorkar aliba Rajasthan state-i state nung tamangba yimsü meyipba nokdangtsü nükjidong nung June 18, 2024 nü Supreme Court nem affidavit ka agütsüogo.

Delhi nung alir lawyer ka aser BJP nungi Ashwini Kumar Upadhyay-i tamangba yimsü meyipba nokdangtsü atema Centre sorkar aser state sorkartemi ozüng tesashi yanglutsüla, ta PIL ka agütsüba nung ajemdaker Rajasthan state sorkari SC nem affidavit ji agütsü.

Supreme Court nem agütsüba affidavit nungji yamai shia lir, ozüng alema ashiokja tamangba yimsü meyipdaksüba nung Khristantem shilem agir.

Tang state 11 nü anti conversion ozüngtem benoka lir, aser item state teimbaka BJP-i yimsüsüba state tem lir. Tang anti conversion ozüng benoka aliba state temji Madhya Pradesh, Arunachal Pradesh, Chhattisgarh, Gujarat, Haryana, Himachal Pradesh, Jharkhand,

Karnataka, Odisha, Uttarakhand aser Uttar Pradesh state tem lir.

Rajasthan nungbo tamangba yimsü meyipba nokdangtsü atema ozüng tejangja mali, ta state sorkari agütsüba affidavit nungji shia lir.

Yaküm December ita nung Rajasthan nung BJP-i secular Congress party madak takok anguba sülen BJP-i sorkar küma liasü.

Rajasthan nung Khristan putir kati, "Anti-conversion ozüng benokbaji ajanga Hindu teloktem matsüngdang Khristantem timtemtsü," ta metetdaksü.

Delhi nung Khristan lenir, A.C Michael-i, "Nüngdakba mapang nung ozüngtem yanglur. Ajisüaka iba dak sendakba nungbo item ozüng (anti-conversion) menüngdak," ta ashi.

June 19 nü osangbener den jembidang Michael-i, Supreme Court jagi Rajasthan state sorkar dang state nung ashikülak ajanga yimsü meyipdaksüba kuli tejangja tama meshitsüla, ta ashi.

Rajasthan nung 2006 küm taoba mapang BJP sorkari anti-conversion ozüng ka renema liasü aser state assembly nung agizük saka iba mapang nungji Centre nung Congress sorkar aliba agi state Angh aser linük Tiri magizükba ajanga iba ozüng mebenokteti liasü.

AO OSHI ANGAZÜKDAK: TANÜ ANGAZÜKTSÜBA OJANG



Tabenba

(n) ongko nung atongtepa teimba kümdaktsüba (multiplication) \* Mapa ajak atema tabenba ongko meteta alitsübaaji kanga nungdaker.

Tabennütsüka

(adv) sü aginüa repringba mesüra bilemba (desire to wear) \* Aotsürtemi sü tabennütsüka takteter.

OLONG PAITEP # 6824

15x15 crossword grid with numbers 1-17 indicating starting positions.

TIPIEN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6823 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen,
11. Lemta, 13. Ola, 14. Kin.

NAI-A YA METETTER MA

UEFA EUROPEAN CHAMPIONSHIP 1960 NUNGI TAKOKERTEM :

Table with 4 columns: Year, Winner, Score, Runner-up. Lists European Championship winners from 1960 to 2024.

Sikkim nung sabanger aliba alima penzürtem ajak kümzükogo



Sikkim kübok Mangan district nung anentsü aluba ajanga taolen makai sabanger aliba kecha timtem makai kümzükba noksa angur..

Gangtok, Aami/June 20 (Agencies): Sikkim kübok Mangan district nung anentsü aluba ajanga taolen makai sabanger aliba alima penzür 1447 kecha timtem makai aninogo.

Alima penzürtem tatema parnok 158 Bodhbarnü (June 19) aninba sülen anogo asem agia parnok ajak aninogo.

Tekümzükba maparen ya June 17 nü tenzük aser mezüng alima penzür parnok 50 tekümzükba tesem bushia anir oa liasü.

Iba sülen tasingnü June 18 nü alima penzür timba anina parnok 1237 tashi lendong nungi pila-a anina liasü.

Iba inyakyim ya tasemnübuba nung tembang aser iba anogo tanungba nisung 158 Mangan district kübok Chungthang tesem nungi anina liasü.

Sikkim nung Mangan indang District Magistrate Hem Kumar Chetri-i, telok balala kanga junga sendaktepa inyakba ajanga iba sentong takok ngua inyaktetogo, ta ashi.

Iba sentong ya Mangan district administration, State Disaster Response Force (SDRF), National Disaster Response Force (NDRF), aser Border Roads Organization (BRO) nung longjemer inyaka liasü.

Alima penzürtem aikati parnok lendong nungi jenboa toktsüba atema Sikkim sorkar ketdangsurtem aser mepetmesü nung aliba mapang teyari agütsüba atema nübürtem dang kanga pelaba lemsatetogo.

NPP-i Khandu-i aniba sorkar pusema nungitba sangdongogo

Itanagar, Aami/June 20 (Agencies): National People's Party (NPP)-i Arunachal Pradesh nung Pema Khandu-i aniba Bharatiya Janata Party (BJP) sorkar nongitba officially metetdaksüogo.

Iba osang ya Arunachal Pradesh NPP tir Thangwang Wangham-i Bregostibarnü (June 20) metetdakja liasü.

Arunachal Pradesh NPP tir Thangwang Wangham, shiba state assembly nung MLA ka lir pai ashiba agi, "NPP ya NDA kübok BJP nung shilem ka liaka tanü onoki chief minister pusema metetdakja shiti ka officially agütsüogo."

Iba jenjang agiba sülen Arunachal Pradesh legislative assembly nung Congress MLA Kumar Waii kija opposition züngsem kümogo.

Arunachal Pradesh assembly nung NPP pur MLA pongu lir.

Kasa mapang nung Arunachal Pradesh chief minister Pema Khandu-i, "Arunachal Pradesh nung BJP sorkar nongita pusema atema ni National People's Party (NPP) dang kanga pelar," ta ashi.

"NPP MLA pongui sign sür sorkar pusema shiti ka agütsüba ajanga state terenlok

asoshi ajak longjemer bendanga agütsür aliba sayur," ta pai ashi.

"Asenok ajak senteper Arunachal Pradesh aser state nung aliba nübürtem atema anibelem mesasai maneni inyaksü," ta Arunachal Pradesh chief minister-i shisem.

Taküm Arunachal Pradesh assembly elections nung NPP pur menden 20 nung toktep aser menden pongu nung takok ngua liasü.

Kasa mapang nung BJP pur menden 60 prongla nungi toktep aser parnoki menden 46 koka liasü, kong menden 10 nungbo tetokteper makai parnoki takok nguogo.

Manipur nung KCP-Noyon lenir ka apu



Imphal, Aami/June 20 (Agencies): Manipur Police-i Kangleipak Communist Party-Noyon (KCP-N) telok nungi tongtibang lenir ka Bodhbar aonung meita aoba sentong ka ayongzüka agiba mapang puogo.

Arishi küm 53 tain Kharibam Surchandra Singh shiba dang Telheiba ta ajar, pa Imphal East district kübok tesem ka nung atsüker lia puogo.

Singh ya sorkar office aser school balala nungi senotsü rakzükrakdemba nung densema

aliba atema aitsür liasü.

Police temi meita aoba mapang sen lakh 1.15, auyar aliba two-wheeler scooter ka, mobile phone tem, tashishitsü aketba kuli kaket bena aliba juli ka aser wallet ka ta ngutetogo.

KCP-N züngsem Laikhuram Sanatomba Singh (24), Heikrujam Dinesh Singh (21), aser Tongbram Nganthoiba Singh (21) nung Kakching District nung apuba sülen mapang tatsüka dang lir kasa telok nungi lenir ya pua liasü.

Item nisungtem ket nungi

mobile phone tem, gari ka aser rakzükrakdemtsü atema amshiba shititem ngutetogo. Parnok dang ken o ashishiba sülen ketdangsurtemi Kharibam Surchandra Singh atsüka aliba tesem jangja aküm.

Police temi pua alirtem aser parnok ket nungi ngutetba osettsütem ajak ken o dak sedaka aliba police station tem nem bendanga agütsüogo aser temzüng ozüng dak ajemdaker parnok anema jenjang tapet agitsü.

## Canada-i IRGC telok kiralongrar ta sangdongogo

**Toronto, Aami/June 20 (Agencies):** Küm aika opposition legislators aser Iranian diaspora züngsem kari kanga ajungshia aruba sülen Canada-i Iran indang Islamic Revolutionary Guard Corps (IRGC) ya kiralongrar telok ka ta sangdongogo.

Bodhbarnü iba telemtetba sangdong dang, alima nung kiralongraba anema raratsü asoshi ibai oset tongtipang ka lir, ta Public Safety Minister Dominic LeBlanc-i ashi.

Iba mera ya ajanga IRGC lenirtem densema Iran sorkar ketdangsür meyerijang aika Canada-i aitsü memelatsü.

Iran indang foreign ministry odongtar ajanga iba sangdong ya aitsü aser ibai shisa maka mera ka lir ta ashi.

IRGC ya Iran nung mitkar, yimtenren aser rongsenketzüng tsütsü tongtipang tashi ka lir, shirnok Iran indang Supreme Leader Ayatollah Ali Khamenei den tesendaktep kanga junga lir.

IRGC nungya ground forces, navy aser air force züngsem 190,000 dak tema lir aser parnoki Iran indang tongtipang nok-nü ketdang asür.

Middle East nung IRGC tashi kanga lir aser parnoki tembar linük aser telungpur telok nem overseas operations arm, Quds (Jerusalem) Force ajanga senotsü, nok-nü, hadir, training aser shisatsü agütsür.

Canada-i Quds Force ya kiralongrar telok ta sangdonga lir, saka Bodhbarnü sangdong ajanga IRGC ajanga kiralongrar kumtsür.

Osangbener den jembidang, iba sangdong ya ajanga Canada-i IRGC indang kiralongra tentet samatsütsü asoshi ozü ket nung aliba oset ajak amshitsü ta osang agütsür, ta LeBlanc-i ashi.

"Iran yimli-i Iran telung nung aser tema nung nisung meimchir temeden züngshia maliba tanen makai sayur aser alima ozüng nung amendaka aliba inyakyim samatsütsü mulunga aliba ajiteter," ta pai ashi.

Iba nungja agütsüba sülen tang teinyakdak aser tesüiba mapang inyaka aliba Iran sorkar ketdangsür Canada nung alirtem bushisüngdangtsü aser agientsü.

Iba osang sangdongba sülen Canada indang foreign affairs minister Melanie Joly-i Iran nung aliba Canada nung tapi agi aputsü akok ta ashi.

"Ni jangja-jangja ya ashir, tang Iran nung alirtem kidangi meyipa shilangtsü mapang tongogo," ta lai ashi.

"Aser Iran-i aotsü sentong alirtem, tuo."

Iba sangdong nung telangzüba agüja, Canada-i iba mera agiba ya shisa maka aser yimtenren tsütsü rangloker meraba lir, ta Iran indang foreign ministry odongtar Nasser Kanaani-i ashi.

"Canada inyakyim ajanga Revolutionary Guards indang temeden aser tashi nung mokongshitsü," ta pai ashi.

Tehran nung January 2020 nung IRGC ajanga Flight PS752 khazüka yokba nung asür kinunger tem densema Canada nung aliba Iran nungeri ajungshiaka Ato Kilonser Justin Trudeau lenisüba kübok Canada sorkari taoba mapang IRGC nem kiralongrar tenüng jalokja aliba atsülangtsü memulungi liasü.

Iba tayimtsü nung mena aliba passenger 175 prong asü, kong Canada senso 55 aser Canada nung teti oa alir nisung 30 densema liasü.

Tayimtsü nung missile ya aibelena khaloktsüba lir ta

Tehran-i shia liasü.

Kiralongrar tenüng jaloktsüba mechi taoba mapang IRGC nung tenzüka liaka Iran yimli anema nokdaker Canada nung jenoka aliba Iran nungerdak tenük yoktsü tsübor, ta Trudeau-i 2022 küm shia liasü.

Tesüiba mapang memulungi liaka kechiba tangbo IRGC nem kiralongrar tenüng jaloktsür ta osangbener temi asüngdang dang, security services nungi shisatsü agütsüba aser foreign policy asadanger ang telok ka kiralongrar ta sangdongtsü telemtetba agir, ta LeBlanc-i ashi.

"Canada indang criminal code kübok talenba alitsü atema ibai tatembang mera ka lir," ta pai ashi.

## Israel mitkar aser Netanyahu tsüngta mangatetep tuluba akumer

**Tel Aviv, Aami/June 20 (Agencies):** Israel mitkar indang odongtari linük yimten yimsüsür aser army lenirtem tsüngta mangatetep ulua akumba yimjak nung rakpoktsü aser rara atemtsü atema Gaza Strip nung Hamas samatsütsü Ato Kilonser Benjamin Netanyahu indang nükjidong nung tasüngdangba arur.

Tesem ajungalen sapanga aliba Gaza Strip nung Hamas telungpur samatsütsü tenüng nung ita toku raraba nung Palestine nung nisung 37,000 dak tema tepsetogo, aser Rear Admiral Daniel Hagari-i Israel indang Channel 13 broadcaster dang iba mapa ya khenyongi tamakoktsü aser tai ta

Bodhbarnü ashi.

"Hamas samatsütsü indang inyakyim ya nüburtem tenük nung lisem paloktsürba dang lir. Hamas ya idea, Hamas ya party ka lir. Iba ya nüburtem mulungjang nung tera yanga lir, aser asenoki Hamas samatsütsü ta shirnoki bilemer aji tai," ta pai ashi.

Iba osang nung telangzüba agüja Netanyahu indang office-i ashiba agi, "Ato kilonser mendenpuba sür security cabinet-i Hamas indang military aser yimsü asütsü tashi samatsütsü ya rara nung nükjidong ka ta tejangja shia lir. Iba maparen nung Israel mitkari bendanga agütsür inyaker."



### FoSCoS nung FBOs indang Email ID aser Phone Number yamai update asütsü

FoSCoS User-id atema Primary aser Secondary details kübok Email ID mesüra Phone number agüja aliba mamshitetba mechi password reset mesütetba FBOs atema dang alitsü.

#### Koma Apply asütsü

Iba amala FBOs yagi Designated Officer [Licensing Authority] mesüra Registration Authority dangi email mesüra shiti ajanga pei case indang zülutsüla. Ketdangsür indang email ids ya FoSCoS Homepage - <https://foscoss.fssai.gov.in> indang **'Know your officer'** section nung tsünglanglen agüja aliba yimya nung angutsü -

- Phone number aser Email ID update asütsü atema firm/company indang letterhead nung frim indang temelaba aliba nisungi meyongnem agütsür, login credentials mamshiba kuli tejangja ashitsüla.
- Meyongnem agüja aliba indang Aadhar Card, Voter ID card amala photo identity card copy ka.
- Form A mesüra B nung Tang aliba license (s), registration certificate (s)/application (s) copy ka.

#### Authority ajanga inyaktsü

FBO [FoSCoS User-id] indang Primary aser Secindary Contact Detalis update asütsü atema FoSCoS Window kübok Licensing/Registration Authorities nem utility agütsüogo.

Email mesüra tezüluba shiti ajanga FBO indang temepishiba anguba sülen Licensing/Registration Authorities ajanga contact details update masü dang tekalen shia aliba documents agütsüba nung ajemdaker FBO verify asütsüla.

#### Shia aliba FoSCoS User-id atema email aser mobile number update asüba sülen FBO ajanga Forgot password link ajanga password reset sütettsü.

For any grievances mail us at: [foodsafetynagalandhelpline@gmail.com](mailto:foodsafetynagalandhelpline@gmail.com)  
or Contact Us: +91 6009970644

Time-11:00 a.m - 2:00 p.m, TUESDAY & THURSDAY (on working days)

*State Food Safety Authority,  
Department of Health and Family Welfare, Govt. of Nagaland.*

## Serbia aser Slovenia na draw nung tembang



**Aami/June 20, 2024 (Agencies):** Brehostibarnü Euro Group C nung Serbia aser Slovenia na asaya nung atakzükja aliba mapang tembanger mapang apuloktsür asayaba mapang minute 95 buba nung Luka Jovic-i Serbia atema goal ka idaktsüba sülen asaya goal kaka agütsür tembang.

Asaya nung Slovenia atema mezüngbuba goal full back Zan Karnicnik-i minute 69buba nung idakja parnok tejakdang aküm, aser asaya tatemtsü tashi nunga parnok akoktsü imla liasü, saka Jovic-i goal ka idaktsüba ajanga parnok asayamung nung mezüngbuba asaya akoktsü aliba thitemtsüogo.

Bodhbarnü Group A asaya ka nung Germany-i goal 2-0 agi Hungary akokba sülen parnok knockout-i iogo.

Asaya nung Jamal Musiala (22') aser Ilkay Gundogan (67') nati goal kaka idakja Germany-i takok tajung ngua liasü.

Hungary-i asaya kanga junga tenzük aser parnoki Germany goalkeeper Manuel Neuer nem mapangshia timtem agüja asaya, ajisüaka goal magütsütet.

Hungary nung asayartemi asaya minute 10 tashi amokbanger asaya ajisüaka iba sülen ball timba Germany ket nung dang liasü aser asaya ajak Hungary indang goal len dang asaya liasü. Hungary team-i mapangshia counter süa asaya ajisüaka Germany-i asaya tanungba ajak amokbanger asaya takok angu.

Bodhbarnüsa Switzerland aser Scotland na asaya goal 1-1 agütsür kasasa nung tembanga liasü.

Iba asaya nung Switzerland atema arishi küm 32 tain asayar Xherdan Shaqiri, shiba tang MLS nung asayadar pai goal tajung ka idakja liasü.

Shaqiri-i 2014 küm World Cup nungi tenzük international asayamung trok atonga asayaba

mapang asayamung shia nung goal idaktsüogo.

Pai World Cups asem aser European Championships asem atonga asayaba mapang goal idaktsüogo aser UEFA-i ashiba agi, pa kijai iba alizüing tongteter lir.

Asaya tenzük minute 13buba nung Scott McTominay-i metsüba ball ka Fabian Schar dak tsükdaker Switzerland goalkeeper Yann Sommer adena ia Scotland goal ka agi tejakdang aküm.

Ajisüaka minute 26buba nung Anthony Ralston-i agütsüba ball ka Shaqiri-i kanga junga metsüokja goal kasasa aküm aser iba sülen telok kati danga goal magütsüteti asaya tembanga liasü.

**JUNE 21**

Slovakia Vs Ukraine 6:30 PM

Poland Vs Austria 9:30 PM

Netherlands Vs France

12: 30am (June 22)

## Osaka, Wozniacki & Kerber nem wild cards agütsü



**Aami/June 20, 2024 (Agencies):** Taoba mapang world number one asayar Kerber, Naomi Osaka aser Caroline Wozniacki nung nem taruba ita asayatsü aliba Wimbledon championship nung main draw atema wild cards agütsüogo, ta asayamung ayongertemi metetdaksü.

Kerber, shiba ita 18 tashi tanur soa bentsüba ajanga tang jenjang 224 nung lir, lai iba asayamun ya 2018 küm kokogo

aser 2016 küma la runner-up liasü.

Kasa mapang nung Osaka aser Wozniacki nata tanur soa bentsüba ajanga mapang talangka masayi aruogo. Tena senteper Grand Slam pongu tashi koka liasü.

Japan tsür Osaka, shiba taoba hopta Rosmalen Grass Court Championships nung quarter final tonga asaya liasü, lai Wimbledon nung anaben tashi tasembuba round tonga

asayaogo aser Wozniacki-i kasa asayamung nung trokben tashi round of 16 tongteto.

Local asayar aser taoba mapang U.S. Open champion Emma Raducanu, shiba taoba küm tetsüing aser teka naprongla nung surgery aiba ajanga ita ti tashi masayai laisü, la nema iba grasscourt Grand Slam atema wildcard agütsüogo.

Raducanu ya tang world rankings nung jenjang 165buba nung lir.

Britain tsür Fran Jones, Lily Miyazaki, aser Heather Watson nungera tetsür kija asaya nung shilem agütsü atema wild card agütsüogo.

Teburtem asaya nung wild card ajak Britain nung asayartem nem dang agütsüogo, kong Liam Broady-a densema lir.

Tetsür aser tebur asaya naprongla atema ano wild card kaka agütsütsü anunga lir.

## UEFA-i Albania aser Serbia na dang senchi achi

**Aami/June 20, 2024** liasü.

**(Agencies):** European Championship nung Albania aser Serbia team asayaba mapang fan temi nationalist maps keta aliba banner tem sayuba atema UEFA-i Bodhbarnü Albanian aser Serbian soccer federations dang senchi euro 10,000 chiogo.

Asaya dak mapet mepetmesü keta aliba osang prokshiba atema federation anaprongla dang senchi chiogo, kechiyong stadium tem nung fan tem inyakyim azioktsü ya parnok khuret lir.

Honibarnü Dortmund nung Italy goal 2-1 agi makokba asaya nung Albania nung fan temi par linük arrtsü atsülangshia aliba map ka banner nung inoker sayua liasü. Iba map nung parnok litsü ya kidanger linüktem indang litsü dena agisemer aliba sayuogo.

Kasa mapang nung Gelsenkirchen nung England goal 1-0 agi makokba asaya nung Serbia nung fan tem indang banner nung Kosovo litsü dena densema aliba sayuba den "No Surrender" ya yimiyim zülur

2022 World Cup nunga Brazil den asayatsü lia asayartemi ibala mesükba osang zülü aliba banner ka matsüdang locker room nung noksa ka tangokba sülen FIFA-i ken o bushisüingdanga obendang agütsü.

UEFA-isa, Serbia nung fan temi inyakyim anema jenjang agiba atema bushisüingdang balaka tenzükogo. Kosovo soccer federation-i, UEFA nem formal tashishiba ka agütsüogo.

Maneni Albanian federation dang ano senchi talila euro 27,375 chiogo. Albania nung fan temi flares aser fireworks tsüklokba, beer marok mereploktsüba aser fan ka ground telungi aiba atema iba senchi chia liasü.

Albania pur Group B nung Croatia den goal 2-2 agütsür tembangba asaya sülen ghonda ishika lir UEFA-i parnok nem temerenshi agütsüba sangdonga liasü.

Serbia nung fan temi beer marok mereploktsüba atema Serbia indang federation-i ano euros 4,500 talila agütsütsü.

## Steve Leicester manager kümogo

**Aami/June 20, 2024** atema telemtetba agiba atema

**(Agencies):** Leicester City-i taoba Nottingham Forest coach Steve Cooper parnok indang manager mapa inyaksü atema shimogo. Pa den küm asem atema tenanzüktepbba yangluogo.

Coach Enzo Maresca-i June ita tetenzüklen club toktsür Chelsea-i aoba sülen Leicester pur coach tasen ka bushitsüsa aküm.

Maresca taoba season tenzükdang Leicester nung aden aser pa lenisüba nung club Championship nung temaba jenjang nung tembanga liasü.

"Ni Leicester City indang first-team manager mapa inyaksü shimba atema kanga pelar aser nemadanga bilemer," ta Cooper-i ashi.

"Iba club ya puti otsü tajung aliba aser club bendanga agüja nongita pusemba nüburtem aliba club tajung ka lir. Ni sempet tajung aketba squad den inyaksü aser külemi Premier League nung nukjidongtem aser tetsükdaktsütem koktetyonga aotsü atema yongya atar," ta paisa ashi.

Championship title abenba sülen Maresca-i club toktsütsü

Leicester pur tezüdanga liasü.

Parnoki West Brom manager Carlos Corberan densema coach mapa bendaktsütsü atema nisung ishika asadangogo.

Cooper-i Premier League nung coach mapa inyakatokogo, koba Leicester atema tajanzük asütsü. Pa Forest indang manager liasü aser 2022 küm parnok PL-i promote asüba sülen pa lenisüba nung parnok 16buba nung tembanga liasü.

Pa ya Forest pusemertemi kanga sakloka liasü, saka taoba season tom nung pa mapa nungi anentsü. Iba mapang Forest pur table nung 17buba nung liasü.

Kasa mapang nung Cooper lenisüba nung England indang Under-17 tema-i 2017 World Cup kokogo. Pa Swansea indang coach mapa-a inyakogo aser 2021 küm pa lenisüba nung Swansea pur Championship play-off final tashi atu, saka tia maka Brentford-i tsükdaktsü.

Cooper lenisüba nung Leicester pur Premier League nung mezüngbuba asaya August 19 nü kidang Tottenham den asayatsü lir.

**BILEMDANGANG**

"Merangdang makokba nung kecha maksü mali. "